

**FRAMSELD REGLUGERÐ FRAMKVÆMDASTJÓRNARINNAR (ESB)
nr. 525/2014****2020/EES/50/32****frá 12. mars 2014****um viðbætur við reglugerð Evrópuþingsins og ráðsins (ESB) nr. 575/2013 um tæknilega eftirlitsstaðla til
skilgreiningar á markaði (*)**

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (ESB) nr. 575/2013 frá 26. júní 2013 um varfærniskröfur að því er varðar lánastofnanir og fjárfestingarfyrirtæki og um breytingu á reglugerð (ESB) nr. 648/2012 ⁽¹⁾ einkum þriðju undirgrein 3. mgr. 341. gr.,

og að teknu tilliti til eftirfarandi:

- 1) Almenn markaðsáhætta er skilgreind í 362. gr. reglugerðar (ESB) nr. 575/2013 sem áhætta af verðbreytingu á fjármálagerningi sem verður ef um er að ræða veltuvíðskipti með skuldagerninga eða skuldaafleiður vegna breytinga á vaxtastigi, eða, ef um er að ræða hlutabréf eða hlutabréfaafleiður, vegna umtalsverðrar hreyfingar á hlutabréfamarkaði sem er óháð séreinkennum einstakra verðbréfa.
- 2) Að því er varðar útreikning á almennri markaðsáhættu sem sýndur er í 343. gr. reglugerðar (ESB) nr. 575/2013, má líta svo á að mismunandi hlutabréf séu á sama markaði ef þau eru háð sömu almennu markaðsáhættu, það er, þar sem verðbreytingar gerningsins ákvarðast af staðbundnum efnahagslegum aðstæðum. Þess vegna ætti „markaður“ í þessum tilvikum að vera skilgreindur með vísun í samþætt hagkerfi sem að jafnaði samsvarar landsbundinni lögsögu.
- 3) Með fyrirvara um ofangreint hefur innleiðing sameiginlegu myntarinnar eytt mikilvægum þáttum í skiptingu á milli hlutabréfamarkaða á evrusvæðinu. Til dæmis hefur hún eytt gjaldmiðilsáhættu milli þátttökuaðildarríkja og gert kleift að birta uppgjör fyrirtækja í sama gjaldmiðli. Enn fremur hefur upptaka evrunnar útheimt umfangsmikla efnahagslega og lagalega samleitni meðal þátttökuaðildarríkja og er hún styrkt með samþættum markaði sem býr yfir sameiginlegum reglum. Þetta síðastnefnda á við um öll aðildarríki Sambandsins, en sameiginlegur gjaldmiðill hefur haft í för með sér nánari og dýpri efnahagssamvinnu þátttökuaðildarríkjanna og réttlætir þess vegna sérstaka meðhöndlun að því er varðar þessa reglugerð. Til samræmis við þetta ætti „markaður“ að vera skilgreindur með tilvísun til allra hlutabréfamarkaða innan evrusvæðisins, og til landsbundinnar lögsögu þegar um er að ræða hlutabréfamarkaði sem ekki nota evru.
- 4) Þessi reglugerð byggir á drögum að tæknilegum eftirlitsstöðlum sem Evrópska bankaeftirlitsstofnunin hefur lagt fyrir framkvæmdastjórnina.
- 5) Evrópska bankaeftirlitsstofnunin hefur haft opið samráð við almenning um drögin að tæknilegum eftirlitsstöðlum sem þessi reglugerð byggir á, greint mögulegan tengdan kostnað og ávinning og óskað eftir álitum hagsmunahópsins um bankastarfsemi sem komið var á fót í samræmi við 37. gr. reglugerðar Evrópuþingsins og ráðsins (ESB) nr. 1093/2010 ⁽²⁾.

(*) Þessi ESB-gerð birtist í Stjttíð. ESB L 148, 20.5.2014, bls. 15. Hennar var getið í ákvörðun sameiginlegu EES-nefndarinnar nr. 81/2019 frá 29. mars 2019 um breytingu á IX. viðauka (Fjármálaþjónusta) við EES-samninginn, sjá EES-viðbæti við *Stjórnartíðindi Evrópu-sambandsins* nr. 44, 2.7.2020, bls. 65.

⁽¹⁾ Stjttíð. ESB L 176, 27.6.2013, bls. 1.

⁽²⁾ Reglugerð Evrópuþingsins og ráðsins (ESB) nr. 1093/2010 frá 24. nóvember 2010 um að koma á fót evrópskri eftirlitsstofnun (Evrópska bankaeftirlitsstofnunin), um breytingu á ákvörðun nr. 716/2009/EB og niðurfellingu ákvörðunar framkvæmdastjórnarinnar 2009/78/EB (Stjttíð. ESB L 331, 15.12.2010, bls. 12).

SAMÞYKKT REGLUGERÐ ÞESSA:

1. gr.

Skilgreining á „markaði“ í þeim tilgangi að reikna út hreina heildarstöðu eiginfjárgæringa sem um getur í 2. mgr. 341. gr. reglugerðar (ESB) nr. 575/2013

Hugtakið „markaður“ skal merkja:

- a) að því er varðar evrusvæðið, öll hlutabréf skráð á hlutabréfamarkaði sem staðsettur er í aðildarríki sem hefur tekið upp evru sem sinn gjaldmiðil,
- b) að því er varðar aðildarríki utan evrusvæðisins og þriðju lönd, öll hlutabréf skráð á hlutabréfamarkaði sem staðsettur er innan landsbundinnar lögsögu.

2. gr.

Gildistaka

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 12. mars 2014.

Fyrir hönd framkvæmdastjórnarinnar,

José Manuel BARROSO

forseti.
